

Rapport dalla sessiun dil cussegl da vischnaunca dils 12-08-2013

Tractanda 1

Approbaziun dil protocol dalla sessiun dils 10-06-2013

Il protocol dalla sessiun dils 10-06-2013 vegn approbaus en votaziun unanima cun engraziament.

Tractanda 2

Elecziun d'in(a) actuar(a) ad hoc

Il president dil cussegl da vischnaunca Flurin Decurtins informescha, ch'igl actuarat sa vegnir surdaus ad in emploiau dalla administraziun communal tenor artechel 12 dil regulativ da fatschentas. El propona d'eleger la vicecanzlista Sandra Gautschi sco actuaera entochen la fin digl onn 2013. Sandra Gautschi prepara ils messadis ed ei sil current davart las tractandas dil cussegl da vischnaunca.

Cun 12 : 0 vuschs elegia il cussegl da vischnaunca Sandra Gautschi sco actuaera entochen la fin digl onn 2013.

Tractanda 3

Approbaziun digl uorden da scola dil consorzi da scola Sumvitg-Trun

Sin l'entschatta digl onn da scola 2013/2014 han las duas vischnauncas da Trun e Sumvitg decidiu da menar las scolas popularas ensemen, e quei en fuorma d'in consorzi da scola. Il cussegl da vischnaunca dils 7 da matg 2012 e la radunonza communal dils 23 da matg 2012 han decidiu da separticipar al consorzi da scola Sumvitg-Trun ed approbau ils statuts leutier.

Per finir las lavurs preparativas duei ussa aunc igl uorden da scola vegnir approbaus sco quei ch'ils statuts dil consorzi prevedan en art. 8. Il cussegl da scola dil consorzi ha elaborau la proposta per mauns dallas vischnauncas. Il departament d'educaziun, cultura e protecziun digl ambient dil Grischun ha da sia vart era examinau la proposta dil cussegl da scola e sustegn quella. A Sumvitg ei la approvaziun digl uorden da scola succedida ils 21 da zercladur entras la radunonza communal.

Cun 12 : 0 vuschs approbescha il cussegl da vischnaunca igl uorden da scola dil consorzi da scola Sumvitg-Trun

Tractanda 4

Vendita da terren ord la parcella 259 a Gravas/Zignau

Signur Stefan Küttel damonda la vischnaunca da saver acquistar terren agricol ord la parcella 259 da vischnaunca per engrondir siu menaschi puril a Zignau/Gravas.

Per la suprastonza communal eis ei in fatg legreivel ch'ei dat differents menaschis purils cun avegnir en vischnaunca. Ins vul possibilitar e promover ina existenza cuzzonta e propona al cussegl da vischnaunca da vender a signur Küttel conform alla lescha purila 2500 m² ord la parcella 259 a Gravas/Zignau.

Cun 11 : 0 vuschs vegn la suprastonza communal autorisada da far quella fatschenta.

Tractanda 5

Vendita da terren ord la parcella 1654 a Pendas

Signur Meinrad Livers damonda la vischnaunca da saver acquistar terren agricol ord la parcella 1654 da vischnaunca per engrondir siu menaschi puril a Trun/Pendas.

Ord ils medems motivs sco tier la tractanda passada propona la suprastanza era cheu da conceder la vendita da 2623 m² ord la parcella 1654 a Pendas.

Cun 12 : 0 vuschs vegn la suprastanza communal autorisada da far quella fatschenta.

Tractanda 6

Damonda dalla firma Tarcisi Maissen SA per terren en dretg da baghegiar ord la parcella 1637

Signur Flurin Maissen sco representant dalla fatschenta Tarcisi Maissen SA ha dumandau la vischnaunca per in dretg da baghegiar sin ina part dalla parcella 1637 terren communal che sesanfla en zona da mistregn a Clius. Ils possesurs dalla fatschenta prevedan d'engrondir il menaschi existent cun in baghetg per la producziun da crap.

La suprastanza communal ei sefatschentada cun la damonda ed ei digl avis da conceder il dretg da baghegiar e d'applicar las medemas cundiziuns sco per ils dretgs da baghegiar ch'ei in gia vegni concedi durant ils onns passai ad autras fatschentas dil vitg.

La suprastanza communal propona:

- D'autorisar la suprastanza communal da conceder alla firma Tarcisi Maissen SA il dretg da baghegiar permanent ed independent per in cuoz da 60 onns.
- Per ils emprems 10 onns naven dil datum da contract vegn desistiu d'in tscheins per il dretg da baghegiar.
- Per il rest dil temps da contract paga il favorisau in commensurau tscheins per il dretg da baghegiar.

Cun 11 : 0 vuschs autorisescha il cussegl da vischnaunca la suprastanza communal da far quella fatschenta tenor proposta.

Tractanda 7

Approbaziun dil quen 2012 dalla meglieraziun Schlans

Tenor leschas vertentas ha il cussegl il pensum d'approbar il quen dalla meglieraziun funsila Schlans. Il quen ei vegnius revedius dalla cumissiun da gestiun e dil revisur da quen dil cantun.

Igl onn 2012 ha ei dau expensas totalas da frs. 489'697.65 ed entradas totalas da frs. 909'982.65. Las expensas totalas per igl entir project da meglieraziun da Schlans contonschan per la fin digl onn 2012 la summa da frs. 7'099'692.-. Las entradas da confederaziun, cantun, vischnaunca e privats muntan à frs. 7'360'990.-.

Cun 12 : 0 vuschs vegn il quen 2012 dalla meglieraziun Schlans approbaus.

Tractanda 8

Reelecziun dalla cumissiun da meglieraziun Schlans

Tenor reglament dalla meglieraziun elegeva la radunonza communal da Schlans mintgamai il president e ses commembers. Damai ch'igl ei buca vegniu stipulau el contract da fusiun da mantener quell'elecziun tier la radunonza communal cumpeta ella tenor la costituziun communal dalla vischnaunca da Trun ussa al cussegl da vischnaunca.

Il president Theo Maissen ed ils commembers Donat Nay, Reto Pfister, Toni Pfister ed Alfred Vincenz stattan a disposiziun per la reelecziun. Il commember Leo Hug ha demissiunau.

Ord il miez vegn proponiu d'eleger sco representant dils purs da Trun Lucas Arpagaus da niev en la cumissiun da meglieraziun.

Theo Maissen vegn elegius cun 12 : 0 vuschs sco president dalla cumissiun da meglieraziun entochen la fin dil trienni 2012-2014.

Lucas Arpagaus, Donat Nay, Reto Pfister, Toni Pfister ed Alfred Vincenz vegnan elegi cun 12 : 0 vuschs sco commembers dalla cumissiun da meglieraziun entochen la fin dil trienni 2012-2014.

Tractanda 9

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Flurin Decurtins

L'actuara ad hoc
Sandra Gautschi